

## 《大智度論》卷 70

〈釋佛母品第四十八之餘〉<sup>1</sup>

（大正 25，545b2-547c20）

釋厚觀（2011.10.01）

### 【經】

#### （2）次辨四心——出、沒、屈、申

##### A、總說

「復次，須菩提！佛因深般若波羅蜜，眾生<sup>2</sup>心數出、沒、屈、申如實知。」

##### B、別釋

「世尊！云何佛因般若波羅蜜，眾生心數出、沒、屈、申如實知？」

##### （A）總明四心皆依五蘊生

佛言：「一切眾生心數出、沒、屈、申等皆依色、受、想、行、識生；須菩提！佛於是中知眾生心數出、沒、屈、申。」<sup>3</sup>

##### （B）別辨

##### a、執神及世間常、無常等四句

所謂神及世間常是事實，餘妄語——是見依色；<sup>4</sup>神及世間無常是事實，餘妄語——是見依色；神及世間常亦無常是事實，餘妄語——是見依色；神及世間非常非無常是事實，餘妄語——是見依色。

神及世間常是事實，餘妄語——是見依受；神及世間無常是事實，餘妄語——是見依受；神及世間常亦無常是事實，餘妄語——是見依受；神及世間非常非無常是事實，餘妄語——是見依受。

神及世間常是事實，餘妄語——是見依想；神及世間無常是事實，餘妄語——是見依想；神及世間常亦無常是事實，餘妄語——是見依想；神及世間非常非無常是事實，餘妄語——是見依想。

<sup>1</sup>（大智……十）十七字＝（大智度論卷第七十釋第四十八品下佛母品訖四十九品）二十三字【宋】，＝（大智度論卷第七十釋佛母品第四十八下訖四十九品）二十二字【元】，＝（大智度論卷第七十釋佛母品第四十八之下）十八字【明】，＝（大智度論卷第七十釋第四十八品下佛母品訖四十九品）二十三字【宮】，＝（大智度經論釋第四十七品下，七十訖第四十八品）二十字【聖】，＝（摩訶般若波羅蜜品四十七之餘卷七十）十六字【石】。（大正 25，545d，n.10）

<sup>2</sup>（諸）＋眾生【聖】【聖乙】【石】。（大正 25，545d，n.12）

<sup>3</sup>《大般若波羅蜜多經》卷 442〈46 佛母品〉：

佛言：「善現！一切如來、應、正等覺依深般若波羅蜜多，能如實知彼諸有情出沒屈伸心、心所法，皆依色、受、想、行、識生。善現！如是如來、應、正等覺依深般若波羅蜜多，能如實知彼諸有情心、心所法，若出若沒、若屈若伸，謂諸如來、應、正等覺依深般若波羅蜜多，能如實知彼諸有情出沒屈伸心、心所法。」（大正 7，228b15-21）

<sup>4</sup>《大般若波羅蜜多經》卷 442〈46 佛母品〉：「或依色執我及世間常，此是諦實，餘皆愚妄。」（大正 7，228b21-22）

神及世間常是事實，餘妄語——是見依行；神及世間無常是事實，餘妄語——是見依行；神及世間常亦無常是事實，餘妄語——是見依行；神及世間非常非無常是事實，餘妄語——是見依行。

神及世間常是事實，餘妄語——是見依識；神及世間無常是事實，餘妄語——是見依(545c)識；神及世間常亦無常是事實，餘妄語——是見依識；神及世間非常非無常是事實，餘妄語——是見依識<sup>5</sup>。

#### **b、執世間邊、無邊等四句**

世間有邊是事實，餘妄語——是見依色；世間無邊是事實，餘妄語——是見依色；世間有邊無邊是事實，餘妄語——是見依色；世間非有邊非無邊是事實，餘妄語——是見依色。

依受、想、行、識亦如是。

#### **c、執我與身一、異**

神即是身——是見依色；神異身異——是見依色。<sup>6</sup>

依受、想、行、識亦如是。

#### **d、執死後有無如去四句**

死後有如去<sup>7</sup>是事實，餘妄語——是見依色；死後無如去是事實，餘妄語——

<sup>5</sup> 識+（神及世間常是事實，餘妄語，是見依色）【元】【明】，識+（神及）【聖乙】。（大正 25，545d，n.17）

<sup>6</sup> 《大般若波羅蜜多經》卷 442〈46 佛母品〉：「或依色執命者即身，此是諦實，餘皆愚妄。或依色執命者異身，此是諦實，餘皆愚妄。」（大正 7，229a9-11）

<sup>7</sup> 印順法師，《如來藏之研究》，pp.13-15：

作為世尊德號的「如來」，並非佛教特有的術語，而是世俗語言，佛教成立以前，印度文化中的固有名詞。世俗一般及宗教學者，對如來是怎樣解說的呢？如《大智度論》卷 55 說：「或以佛名名為如來，或以眾生名字名為如來。如先世來，後世亦如是去，是亦名如來，亦名如去，如十四置難中說。……佛名如來者，……從如中來，故名如來。」（大正 25，454b-c）

如來，在佛教中是佛的別名，解說為「從如中來」，就是悟入真如而來成佛的（「乘如實道來」）。在一般人，如來是眾生的別名，所以說：「我有種種名，或名眾生、人、天、如來等。」（《中論》卷 4（大正 30，30a））換言之，如來就是「我」的別名。在釋尊當時的印度宗教界，對於眾生的從生前到死後，從前生到後世，都認為有一生命主體；這一生命自體，一般稱之為我（ātman）。「我」從前世來，又到後世去，在生死中來來去去，生命自體卻是如是如是，沒有變異。如如不變，卻又隨緣而來去，所以也稱「我」為「如來」，也可以說「如去」。

「十四置難」，是釋尊時代，一般宗教界所歡喜論究的十四個問題。這些難問，釋尊一概置而不答，以不加答覆來答覆他們。「十四置難」中，就有如去，如不去，如亦去亦不去，如非去非不去——四問。十四置難，即十四無記，在《阿含經》中，是一再見到的。《大智度論》這樣說：

- (1) 「何等十四難？……死後有神去後世，無神去後世，亦有神去亦無神去（後世），死後亦非有神去亦非無神去後世。」（《大智度論》卷 2（大正 25，74c））
- (2) 「有死後如去，有死後不如去，有死後如去不如去，有死後亦不如去亦不不如去。」（《大智度論》卷 7（大正 25，110a））
- (3) 如佛問先尼梵志：「汝見是色如去不？答言：不也。受、想、行、識如去不？答言：不也。色中如去不？答言：不也。受、想、行、識中如去不？答言：不也。離色如去不？」

是見依色；死後或有如去或無如去是事實，餘妄語——是見依色；死後非有如去非無如去是事實，餘妄語——是見依色。<sup>8</sup>

依受、想、行、識亦如是。

### C、結

如是，須菩提！佛因<sup>9</sup>般若波羅蜜，眾生出、沒、屈、申如實知。

## (三) 示諸法如無二無別

### I、正明如相

#### (1) 約法辨

##### A、依五蘊辨

復次，須菩提！佛知色相。云何知色相？

如『如』不壞、無分別、無相、無憶、無戲論、無得，色相亦如是。

須菩提！佛知受、想、行、識相。云何知受、想、行、識相？

如『如相』不壞、無分別、無相、無憶、無戲論、無得，受、想、行、識相亦如是。<sup>10</sup>

##### B、依一切法辨

如是，須菩提！佛知眾生如相及眾生心數出、沒、屈、申如相。

五<sup>11</sup>眾如相，諸行如相，即是一切法如相。何等是一切法如相？所謂六波羅蜜如相，六波羅蜜如相即是三十七品如相，三十七品如相即是十八空如相，十八空如相即是(546a)八背捨如相，八背捨如相即是九次第定如相，九次第定如相即是佛十力如相，佛十力如相即是四無所畏、四無礙智、大慈大悲乃至十八不共法如相，十八不共法如相即是一切種智如相，一切種智如相即是善法不善法、世間法

---

答言：不也。離受、想、行、識如去不？答言：不也。汝更見無色、無受、想、行、識如去者不？答言：不也。……梵志本總相為我，佛今一一別問，以是故答佛言不也。」

(《大智度論》卷 42 (大正 25, 368c))

比對前二則，有沒有「神去」，就是有沒有「如去」。「神」是「我」的舊譯。佛與先尼梵志的問答，出於《阿含經》；《般若經》引佛與先尼梵志的問答，來說明大乘深義。經上問色如與受、想、行、識如的去不去，而龍樹解說為：「梵志本總相為我，佛今一一別問」，可見所問的「如」就是我；「如去」（約從前生來今生，可名「如來」）就是神我的來去。

<sup>8</sup> 《大般若波羅蜜多經》卷 442〈46 佛母品〉：「或依色執如來死後有，此是諦實，餘皆愚妄。或依色執如來死後非有，此是諦實，餘皆愚妄。或依色執如來死後亦有亦非有，此是諦實，餘皆愚妄。或依色執如來死後非有非非有，此是諦實，餘皆愚妄。」(大正 7, 229a19-23)

<sup>9</sup> 因=曰【聖】。(大正 25, 545d, n.18)

<sup>10</sup> 《大般若波羅蜜多經》卷 442〈46 佛母品〉：

佛言：「善現！一切如來、應、正等覺依深般若波羅蜜多，如實知色如真如無變異、無分別、無相狀、無作用、無戲論、無所得，亦如實知受、想、行、識如真如無變異、無分別、無相狀、無作用、無戲論、無所得。善現！如是如來、應、正等覺依深般若波羅蜜多，如實知色，亦如實知受、想、行、識。」(大正 7, 229b19-25)

<sup>11</sup> (是) + 五【元】【明】【聖】【聖乙】。(大正 25, 545d, n.21)

出世間法、有漏法無漏法如相，無<sup>12</sup>漏法如相即是過去、未來、現在法<sup>13</sup>如相，過去、未來、現在法如相即是有為法、無為法如相，有為法、無為法如相即是須陀洹果如相，須陀洹果如相即是斯陀含果如相，斯陀含果如相即是阿那含果如相，阿那含果如相即是阿羅漢果如相，阿羅漢果如相即是辟支佛道如相，辟支佛道如相即是阿耨多羅三藐三菩提如相，阿耨多羅三藐三菩提如相即是諸佛如相，諸佛如相皆是一如相，不二不別、不盡不壞——是名一切諸法如相。<sup>14</sup>

## (2) 結

佛因般若波羅蜜得是如相，以是因緣故，般若波羅蜜能生諸佛、能示世間相。如是，須菩提！佛知一切法如相——非不如相，不異相；得是如相故，佛名如來。」<sup>15</sup>

## 2、歎如甚深

### (1) 須菩提歎

須菩提白佛言：「世尊！是諸法如相——非不如相，不異相——甚深！

世尊！諸佛用是如，為人說阿耨多羅三藐三菩提。

世尊！誰能信解是者？唯有阿鞞跋致菩薩及具足正見人、漏盡阿羅漢。<sup>16</sup>何以故？是法甚深故。」<sup>17</sup>

### (2) 佛述成

「須菩提！是如無盡相故甚深。」<sup>18</sup>

<sup>12</sup> (有漏法) + 無【宋】【元】【明】【宮】。(大正 25, 546d, n.1)

<sup>13</sup> (諸) + 法【宋】【元】【明】【宮】【聖】【聖乙】。(大正 25, 546d, n.2)

<sup>14</sup> 《大般若波羅蜜多經》卷 442〈46 佛母品〉：「復次，善現！五蘊真如即有情真如，有情真如即出沒屈申真如，出沒屈申真如即五蘊真如，五蘊真如即十二處真如，十二處真如即十八界真如，十八界真如即一切法真如，一切法真如即六波羅蜜多真如，六波羅蜜多真如即三十七菩提分法真如，三十七菩提分法真如即十八空真如，……阿羅漢果真如即獨覺菩提真如，獨覺菩提真如即一切菩薩摩訶薩行真如，一切菩薩摩訶薩行真如即諸佛無上正等菩提真如，諸佛無上正等菩提真如即一切如來、應、正等覺真如，一切如來、應、正等覺真如即一切有情真如。

善現！若一切如來、應、正等覺真如，若一切有情真如，若一切法真如無二無二處，是一真如，如是真如無別異故，無壞、無盡，不可分別。」(大正 7, 229b25-230a1)

<sup>15</sup> 《大般若波羅蜜多經》卷 442〈46 佛母品〉：「善現！一切如來、應、正等覺依深般若波羅蜜多，證一切法真如究竟，乃得無上正等菩提，由此故說甚深般若波羅蜜多能生諸佛，是諸佛母，能示諸佛世間實相。善現！如是如來、應、正等覺依深般若波羅蜜多，能如實覺知一切法真如不虛妄性、不變異性。由如實覺真如相，故說名如來、應、正等覺。」(大正 7, 230a1-8)

<sup>16</sup> 另參見《大智度論》卷 55〈28 幻人聽法品〉(大正 25, 450b)。

<sup>17</sup> 《大般若波羅蜜多經》卷 442〈46 佛母品〉：

時，具壽善現白佛言：「世尊！甚深般若波羅蜜多所證一切法真如不虛妄性、不變異性，極為甚深難見難覺。世尊！一切如來、應、正等覺皆用一切法真如不虛妄性、不變異性，顯示分別諸佛無上正等菩提。世尊！一切法真如甚深誰能信解？唯有不退位菩薩摩訶薩，及具正見、漏盡阿羅漢，聞佛說此甚深真如能生信解，如來為彼依自所證真如之相顯示分別。」(大正 7, 230a8-16)

<sup>18</sup> 《大般若波羅蜜多經》卷 442〈46 佛母品〉：

佛言：「善現！如是！如是！如汝所說。所以者何？善現！真如無盡是故甚深，唯有如來現等正覺無盡真如。」(大正 7, 230a16-18)

須菩提言：「何法無盡相故甚深？」

佛言：「一切法無盡故。如是，須菩提！佛得是一切諸法如已，為眾生說。」<sup>19</sup>

【論】釋曰：

(2) 次辨四心：出、沒、屈、申

A、總說

佛悉知一切眾生所作所行、六十二邪見等諸邪見、九十八結使等諸煩惱，(546b) 是故說：「佛知眾生心心數法出、沒、屈、申。」

B、別釋

(A) 論主釋

a、釋義

(a) 沒、出

在家者為愛等諸煩惱所沒名為「沒」，九十六種邪見出家者名「出」<sup>20</sup>。復次，常著世樂，故名為「沒」；或知無常，怖畏，求道，故名「出」。復次，受九十六種道法，不能得正道故，還沒在世間。

(b) 屈、申

「屈」者不離欲界，「申」者離欲界。色界離、不離，亦如是。

b、舉喻

如人立清池上見魚——<sup>(1)</sup>或有常在水中，<sup>(2)</sup>或有暫出還沒，<sup>(3)</sup>或有出觀四方，<sup>(4)</sup>或有出欲渡者近岸還沒。<sup>21</sup>

c、合法

佛亦如是，以佛眼觀十方六道眾生——

- <sup>(1)</sup>有常著五欲，諸煩惱覆心，不求出者；
- <sup>(2)</sup>或有好心，能布施、能持戒，而以邪疑覆心故還沒；
- <sup>(3)</sup>有人出五欲，能得煖法、頂法等，觀四諦，未得實<sup>22</sup>法故還沒；
- <sup>(4)</sup>有人離五欲乃至無所有處，不得涅槃故還沒。

(B) 依經釋

何等是出、沒、屈、申相？

a、執神我及世間常、無常等四句

此中佛說，所謂「神及世間常」。

<sup>19</sup> 《大般若波羅蜜多經》卷 442〈46 佛母品〉：

佛言：「善現！證一切法無盡真如。善現！一切如來、應、正等覺證得一切法無盡真如故，獲得無上正等菩提，為諸有情分別顯示一切法真如相，由此故名真實說者。」(大正 7, 230a22-25)

<sup>20</sup> (為) + 出【元】【明】【聖乙】【石】。(大正 25, 546d, n.8)

<sup>21</sup> 參見《中阿含經》卷 1 (4 經)《水喻經》(大正 1, 424a13-425a13)。

<sup>22</sup> 實 + (相)【聖乙】【石】。(大正 25, 546d, n.12)

**(a) 執神我之四種邪見**

「神」者，凡夫人憶想分別，隨我心取相故計有神。

**I、常見，II、無常見**

外道說神有二種：一者、常，二者、無常。

若計「神常」者，常修福德，後受果報故，或由行道故，神得解脫。

若謂「神無常」者，為今世名利故有所作。

**III、常無常見**

「常無常」者，有人謂：神有二種：一者、細微常住，二者、現有所作。

現有所作者，身死時無常。

細神是常。

**IV、非常非無常見**

有人言：神非常非無常。

「常」、「無常」中，俱有過——若神無常，即無罪福；若<sup>23</sup>常，亦無罪福。

何以故？若常，則苦樂不異；譬如虛空，雨不能濕、風日不能乾。

若無常，則苦樂變異；譬如風雨，在牛皮中則爛壞。

以我心故，說必有神，但非常非無常。

**※ 小結**

佛言：「四種邪見，皆緣五眾，但於五眾謬計為神。」

**(b) 執世間之四種邪見****I、辨「世間」相**

「神及世間」者。

「世間」(546c)有三種：一者、五眾世間，二者、眾生世間，三者、國土世間。<sup>24</sup>

此中說二種世間——五眾世間、國土世間；眾生世間即是神。

**II、如前說神有四種邪見，世間亦有四種邪見**

於世間相中，亦有四種邪見。

**III、釋疑：世間邪見四句之難**

問曰：神從本已來無故應錯；世間是有，云何同神邪見？

答曰：

**(I) 總說：破執不破法**

但破於世間起常無常相，不破世間；譬如無目人得蛇以為瓔珞，有目人語是蛇，非是瓔珞。

<sup>23</sup> 若+（神）【元】【明】【聖乙】。(大正 25, 546d, n.17)

<sup>24</sup> 一眾生世間

三種世間—住處世間（國土世間）

—五眾世間

(印順法師，《大智度論筆記》[B013] p.132)

**（Ⅱ）別破：破常等四執**

佛破世間常顛倒，不破世間。<sup>25</sup>何以故？現見無常故。  
亦不得言「無常」<sup>26</sup>，罪福不失故，因過去事有所作故。  
常無常，二俱有過故；  
非常非無常，著世間過故。

**b、執世間有邊、無邊等四句**

**（a）執世間有邊**

「世間有邊」者。

**I、第一說：若無始則無世間，故應有邊**

有人求世間根本，不得其始；不得其始，則無中、無後；若無初、中、後，則無世間。是故世間應有始——「始」即是「邊」。

**II、第二說：數論約「世性」為始，世性→覺→我→五種微塵→五大→五根**

得禪者，宿命智力，乃見八萬劫事，過是已往，不復能知，但見身始中陰識，而自思惟：「此識不應無因無緣，必應有因緣，宿命智所不能知。」但憶想分別：

有法名「世性」<sup>27</sup>，非五情所知，極微細故。

於世性中初生覺——「覺」即是「中陰識」。

從覺生我。

從我生五種微塵——所謂色、聲、香、味、觸。

從聲微塵生空<sup>28</sup>大，從聲、觸生風大，從色、聲、觸生火大，從色、聲、觸、味生水大，從色、聲、觸、味、香生地大。

從空生耳根，從風生身根，從火生眼根，從水生舌根，從地生鼻根。

如是等漸漸從細至麤。

「世性」者，從世性已來至麤，從麤轉細，還至世性。

譬如泥丸中具有瓶、瓮等性，以泥為瓶，破瓶為瓮，如是轉變，都無所失；世性亦如是，轉變為麤。

世性是常法，無所從來。

如《僧佉經》廣說「世性」。

**III、第三說：「微塵」為始**

復次，(547a) 有人說：世間初邊名「微塵」。

<sup>25</sup> 世間非常等：但破顛倒，不破世間。（印順法師，《大智度論筆記》〔E014〕p.310）

<sup>26</sup> （1）無無常=無常【宋】【元】【明】【宮】【聖】。（大正 25，546d，n.24）

（2）《大正藏》與《高麗藏》（第 14 冊，1070a23）原作「無無常」，今依【宋】【元】【明】【宮】【聖】及文義作「無常」。

<sup>27</sup> 印順法師，《中國禪宗史》，p.384：「依數論說：自性（羅什譯為世性。約起用說，名為勝性。約微妙不易知說，名為冥性）為生起一切的根元。」

<sup>28</sup> （虛）+空【宋】【元】【明】【宮】。（大正 25，546d，n.26）

微塵，常法，不可破、不可燒、不可爛、不可壞，以微細故；但待罪福因緣和合故有身——若天、若地獄等；以無父母故，罪福因緣盡則散壞。

**IV、第四說：「自然」為始**

有人以「自然」為世界始，貧富、貴賤，非願行所得。

**V、第五說：「天主」為始**

有人言：「天主」即是世界始，造作吉凶禍福、天地萬物；此法滅時，天還攝取。

**※ 結前誤執**

如是邪因，是世界邊。

**VI、第六說：眾生自到邊際**

有人說：眾生世世受苦樂盡，自到邊；譬如山上投縷丸，縷盡自止。受罪受福，會歸於盡，精進、懈怠無異。

**VII、第七說：八方國土有邊**

有人說：國土世間，八方有邊，唯上、下無邊。

**VIII、第八說：上下有邊，八方無邊**

有人說：下至十八地獄，上至有頂——上下有邊；八方無邊。

**※ 略結**

如是種種說「世界邊」。

**IX、第九說：眾生世間有邊**

有人說：眾生世間有邊。如說：神在體中，如芥子、如米，或言一寸。大人則神大，小人則神小。

說神是色法、有分，故言「神有邊」。

**(b) 執無邊見**

「無邊」者。

**I、神無邊**

有人說：神遍滿虛空，無處不有，得身處能覺苦樂。是名「神無邊」。

**II、國土世間無邊**

有人言：國土世間無始。若有始，則無因緣，後亦無窮，常受身，是則破涅槃。是名「無邊」。

復次，說國土世間，十方無邊。

**※ 略結**

如是等，說「神世間、國土世間無邊」。

**(c) 執有邊、無邊見**

「有邊」者。



有人言：神世間無邊，國土世間有邊。

或言：神世間有邊，國土世間無邊；如上說「神是色故」。

或言：上下有邊，八方無邊。

如是總上二法，名為「有邊無邊」。

**(d) 世間非有邊非無邊**

「世間非有邊非無邊」者，有人見「世間有邊」有過、「無邊」亦有過，故不說「有邊」、不說「無邊」，著「非有邊非無邊」以為世間實。

**c、執我與身一、異**

**(a) 敘邪執**

**I、神即是身**

「神即是身」者，有人言：身即是神。

所以者何？分析<sup>29</sup>此身，求神不可得故。復次，受好醜苦樂皆（547b）是身。是故言「身即是神」。

**II、身異神異**

「身異神異」者，有人言：神微細，五情所不得，亦非凡夫人所見；攝心清淨，得禪定人，乃能得見。是故言「身異神異」。

**(b) 破謬見**

復次，若「身即是神」，身滅、神亦滅——是邪見。

說「身異神異」，身滅、神常在——是邊見。

**d、執死後有如去、無如去等四句**

**(a) 死後有如去**

「死後有如去」者。

問曰：先說「常無常」等，即是「後世或有或無」，今何以別說「如去」四句？

答曰：上總說「一切世間常非常」，「後世有無」事要故別說。

「如去」者，如人來此間生，去至後世亦如是。

**(b) 死後無如去**

有人言：先世無所從來，滅亦無所去。

**(c) 死後或有如去或無如去**

有人言：身、神和合為人；死後，神去、身不去。是名「如去不如去」。

**(d) 死後非有如去非無如去**

「非有如去非無如去」者，見「去」、「不去」有失故，說「非去非不去」。是人不能捨神，而著「非去非不去」。

<sup>29</sup> [唐]澄觀述，《大方廣佛華嚴經隨疏演義鈔》卷 45〈22 十無盡藏品〉引《大智度論》「分析此身」作「分析此身」（大正 36，353a26）。

**※ 結義**

如是諸邪見煩惱等，是名「心出、沒、屈、伸」。所以者何？邪見者種種道求出不得故，欲出而沒。

邪見力多難解，故說常、無常等十四事。

**(三) 示諸法如無二無別****1、正明如相****(1) 約法辨****A、依五蘊辨**

外道雖復種種憶想分別，佛言：「皆緣五眾、依止五眾，無神、無常。」佛知五眾空、無相、無作、無戲論，但知五眾如，不如凡夫虛誑顛倒見。

**B、依一切法辨**

如五眾如，一切法如亦如是。

何以故？二法攝一切法，所謂有為、無為——五眾是有為法，五眾如即是無為法。<sup>30</sup>觀察、籌量、思惟五眾能行六波羅蜜，是故說：「五眾如即是一切法如，一切法如即是六波羅蜜如。」

行六波羅蜜菩薩求實道，觀五眾無常、空，生三十七品、八背捨、九次第等——是聲聞道；知已直過，行十八空、十力等諸佛法；皆正觀五眾、五眾如，無分別故，皆是一切諸法如。<sup>31</sup>是故說：「善法如即是不善法（547c）如，不善法如即是善法如。」

世間、出世間法亦如是。

是以行者不得著善法<sup>32</sup>，乃至阿耨多羅三藐三菩提，佛如相亦如是，皆是一如相，不二不別。所以者何？求諸法實，到畢竟空，無復異。

**(2) 結**

如是等諸法如，佛因般若波羅蜜得，是故言：「般若波羅蜜能生諸佛、能示世間相。」

**2、歎如甚深****(1) 須菩提歎**

須菩提歎未曾有，白佛言：世尊！一切諸法如甚深，隨順不相違。三世十方諸佛如，即是諸法如；解是諸法如故，為眾生種種說法。

是甚深如，難解難信；

阿鞞跋致菩薩入法位受記者，能信；

「具足正見人」者，三道人；

漏盡阿羅漢，不受一切法故，能信。

<sup>30</sup> 有為無為互不相離：五眾是有為，五眾如是無為。（印順法師，《大智度論筆記》〔E001〕p.285）

<sup>31</sup> 大小說異：大小行異。（印順法師，《大智度論筆記》〔E014〕p.310）

<sup>32</sup> 法+（捨不善法）【宋】【元】【明】【石】，（捨不善界）【聖】【聖乙】。（大正 25，547d，n.12）

其有信者，近阿鞞跋致故，皆攝在阿鞞跋致<sup>33</sup>中，故不別說。

**(2) 佛述成**

佛語須菩提：「一切法無盡故，是如無盡。」

如無盡故，得聖道者能信。

無為法中差別故有須陀洹諸道，<sup>34</sup>聞自所得法故能信；凡夫人著虛誑顛倒法故不能信。

佛告須菩提：「諸佛得是諸法如故，名為如來，名為一切智人，能教眾生令至涅槃。」<sup>35</sup>

---

<sup>33</sup> 〔故皆……致〕八字—【宋】【元】【明】【宮】。（大正 25，547d，n.14）

<sup>34</sup> 無為：賢聖忍此而有差別。（印順法師，《大智度論筆記》〔E005〕p.295）

<sup>35</sup> 所證所說唯如。（印順法師，《大智度論筆記》〔E014〕p.310）

〈釋問相品第四十九<sup>36</sup>〉<sup>37</sup>

(大正 25, 547c21-552c15)

## 【經】

## 壹、明深般若相

## (壹) 天子問

爾時，三千大千世界中所有欲界天子、色界天子遙散華香，來至佛所，頂禮佛足，一面住，白佛言：「世尊！所說般若波羅蜜甚深，何等是深般若波羅蜜相？」

## (貳) 佛答

## 一、正說深般若相

佛告欲界、色界諸天子：「諸天子！<sup>(1)</sup>空相是深般若波羅蜜相，<sup>(2)</sup>無相、<sup>(3)</sup>無作、<sup>(4)</sup>無起、<sup>(5)</sup>無生無滅、<sup>(6)</sup>無垢無淨、<sup>(7)</sup>無所有法、<sup>(8)</sup>無相、<sup>(9)</sup>無依止、<sup>(10)</sup>虛空相是深般若波羅蜜相。諸天子！如是等相是深般若波羅蜜相。<sup>38</sup>

## 二、以世諦說，非第一義

佛(548a)為眾生用世間法故說，非第一義。<sup>39</sup>

## 三、深般若諸相，世間無能壞者

## (一) 標義

諸天子！是諸相，一切世間天、人、阿修羅不能破壞。<sup>40</sup>

## (二) 釋因由

何以故？

## 1、世間天人等亦是相故

是一切世間天、人、阿修羅亦是相故。

<sup>36</sup> 九+ (品，問相品)【宮】。(大正 25, 547d, n.19)

<sup>37</sup> (大智度論釋問相品第四十九)十二字=(摩訶般若波羅蜜品第四十八問相品)十五字【石】，〔大智度論〕—【明】。(大正 25, 547d, n.18)

<sup>38</sup> (1)《放光般若經》卷 11〈50 問相品〉：

「世尊！所說般若波羅蜜者，甚深！甚深！何等是般若波羅蜜相？」

佛告諸天子言：「深般若波羅蜜者，空則是相，無相、無願相，無行之相，無生滅相，無著、無斷相，無所有之空相，無所依相，虛空之相。諸天子！般若波羅蜜甚深如是。」(大正 8, 77b14-18)

(2)《大般若波羅蜜多經》卷 442〈47 示相品〉：

爾時，佛告諸天眾言：「甚深般若波羅蜜多以空為相，甚深般若波羅蜜多以無相為相，甚深般若波羅蜜多以無願為相，甚深般若波羅蜜多以無造無作為相，甚深般若波羅蜜多以無生無滅為相，甚深般若波羅蜜多以無染無淨為相，甚深般若波羅蜜多以無性無相為相，甚深般若波羅蜜多以無依無住為相，甚深般若波羅蜜多以非斷非常為相，甚深般若波羅蜜多以非一非異為相，甚深般若波羅蜜多以無來無去為相，甚深般若波羅蜜多以虛空為相，甚深般若波羅蜜多有如是等無量諸相。」(大正 7, 230b1-13)

<sup>39</sup> 《大般若波羅蜜多經》卷 442〈47 示相品〉：「諸天當知！如是諸相，一切如來、應、正等覺為欲饒益世間天、人、阿素洛等，依世俗諦以想等想施設言說，不依勝義。」(大正 7, 230b13-15)

<sup>40</sup> 《大般若波羅蜜多經》卷 442〈47 示相品〉：「諸天當知！甚深般若波羅蜜多如是諸相，世間天、人、阿素洛等皆不能壞。」(大正 7, 230b15-17)

**2、相不能破相，相不能知相；相不能知無相，無相不能知相**

諸天子！相不能破相，相不能知相，相不能知無相，無相不能知相。

是相、是無相、相無相皆無所知，謂知者、知法皆不可得故。<sup>41</sup>

**四、明空等諸相是實，佛得如實相故名為如來**

**(一) 正說空等諸相非諸法、人、非人等所作**

何以故？諸天子！是諸相非色作，非受、想、行、識作；非檀波羅蜜作，非尸羅波羅蜜、羼提波羅蜜、毘梨耶波羅蜜、禪波羅蜜、般若波羅蜜作；非內空作，非外空作，非內外空作，非無法空作，非有法空作，非無法有法空作；非四念處作，乃至非一切種智作。

諸天子！是諸相，非人所有，非非人所有；非世間，非出世間；非有漏，非無漏；非有為，非無為。」<sup>42</sup>

**(二) 舉喻明理**

佛復告諸天子：「譬如有人問：『何等是虛空相？』此人為正問不？」

諸天子言：「世尊！此不正問。何以故？世尊！是虛空無相可說，虛空無為無起故。」

**(三) 釋疑**

佛告欲界、色界諸天子：「有佛無佛，相性常住。佛得如實相性故，名為如來。」<sup>43</sup>

**(參) 諸天悟解**

諸天子白佛言：「世尊！世尊所得諸相性甚深，得是相故，得無礙智；住是相<sup>44</sup>中，以般若波羅蜜集諸法自相。」

諸天子言：「希有！世尊！是深般若波羅蜜是諸佛常所行處，行是道得阿耨多羅三藐三菩提；得阿耨多羅三藐三菩提已，通達一切法相——若色相，若受、想、行、識相，乃至一切種智相。」<sup>45</sup>

<sup>41</sup> 《大般若波羅蜜多經》卷 442〈47 示相品〉：「何以故？世間天、人、阿素洛等皆有相故。諸天當知！諸相不能破壞諸相，諸相不能了知諸相，諸相不能破壞無相，諸相不能了知無相；無相不能破壞諸相，無相不能了知諸相，無相不能破壞無相，無相不能了知無相。何以故？若相、若無相、若相無相皆無所有，能破、能知、所破、所知、破者、知者不可得故。」（大正 7，230b17-24）

<sup>42</sup> 《大般若波羅蜜多經》卷 442〈47 示相品〉：「諸天當知！如是諸相，非天所作、非非天所作，非人所作、非非人所作；非天所有、非非天所有，非人所有、非非人所有；非有漏、非無漏，非世間、非出世間，非有為、非無為，無所繫屬，不可宣說。」（大正 7，230c26-231a1）

<sup>43</sup> 《大般若波羅蜜多經》卷 442〈47 示相品〉：  
「諸天當知！甚深般若波羅蜜多遠離眾相，不應問言甚深般若波羅蜜多以何為相。汝諸天等於意云何？設有問言虛空何相，如是發問為正問不？」  
諸天答言：「不也！世尊！不也！善逝！何以故？虛空無體、無相、無為，不應問故。」  
世尊告曰：「甚深般若波羅蜜多亦復如是，不應為問。然諸法相有佛無佛，法界法住，佛於此相如實覺知，故名如來、應、正等覺。」（大正 7，231a1-9）

<sup>44</sup> （實）+相【宋】【元】【明】【宮】。（大正 25，548d，n.6）

<sup>45</sup> 《大般若波羅蜜多經》卷 442〈47 示相品〉：  
時，諸天眾俱白佛言：「如來所覺如是諸相，極為甚深，難見難覺。如來現覺如是相故，於一

**(肆) 佛述成****一、正述成**

佛言：「如是！如是！諸天子！

惱壞相是色相——佛得是無相；覺者受相，取者想相，起作者行相，了別者識相——佛得是無相。<sup>46</sup>

能捨者檀波羅蜜相，無熱惱者尸羅波羅蜜相，不變異者羸提波羅蜜相，不可伏者(548b)毘梨耶波羅蜜相，攝心者禪波羅蜜相，捨離者般若波羅蜜相——佛得是無相。<sup>47</sup>

心無所憍惱者，是四禪、四無量心、四無色定相——佛得是無相。

出世間者，三十七品相——佛得是無相。

苦者，無作脫門相；離者，空脫門相；寂滅者，無相脫門相——佛得是無相。<sup>48</sup>

勝者，十力相；不恐怖者，無所畏相；遍知者，四無礙智相；<sup>49</sup>餘人無得者，十八不共法相——佛得是無相。

愍念眾生者，大慈大悲相；實者，無謬錯相；無所取者，常捨相；現了知者，一切種智相——佛得是無相。<sup>50</sup>

切法無礙智轉。一切如來、應、正等覺住如是相，分別開示甚深般若波羅蜜多，為諸有情集諸法相，方便開示，令於般若波羅蜜多得無礙智。

希有！世尊！甚深般若波羅蜜多是諸如來、應、正等覺常所行處，去、來、今世一切如來、應、正等覺行是處故，證得無上正等菩提，為諸有情分別開示一切法相。謂分別開示色相，分別開示受、想、行、識相；……分別開示一切智相，分別開示道相智、一切相智相。」(大正 7, 231a10-b28)

<sup>46</sup> 《大般若波羅蜜多經》卷 443〈47 示相品〉：

爾時，佛告諸天眾言：「如是！如是！如汝所說。諸天當知！一切法相如來如實覺為無相，謂變礙是色相，如來如實覺為無相；領納是受相，如來如實覺為無相；取像是想相，如來如實覺為無相；造作是行相，如來如實覺為無相；了別是識相，如來如實覺為無相。」(大正 7, 231c7-12)

<sup>47</sup> 《大般若波羅蜜多經》卷 443〈47 示相品〉：「能惠捨是布施波羅蜜多相，如來如實覺為無相；無熱惱是淨戒波羅蜜多相，如來如實覺為無相；不忿恚是安忍波羅蜜多相，如來如實覺為無相；不可屈是精進波羅蜜多相，如來如實覺為無相；無散亂是靜慮波羅蜜多相，如來如實覺為無相；無執著是般若波羅蜜多相，如來如實覺為無相。」(大正 7, 231c15-22)

<sup>48</sup> 《大般若波羅蜜多經》卷 443〈47 示相品〉：「能遠離是空解脫門相，如來如實覺為無相；無取著是無相解脫門相，如來如實覺為無相；無所求是無願解脫門相，如來如實覺為無相。」(大正 7, 232a3-6)

<sup>49</sup> 《大般若波羅蜜多經》卷 443〈47 示相品〉：「難屈伏是如來十力相，如來如實覺為無相；無怯懼是四無所畏相，如來如實覺為無相；無斷絕是四無礙解相，如來如實覺為無相。」(大正 7, 232a10-13)

<sup>50</sup> 《大般若波羅蜜多經》卷 443〈47 示相品〉：「與利樂是大慈相，如來如實覺為無相；拔衰苦是大悲相，如來如實覺為無相；慶善事是大喜相，如來如實覺為無相；棄雜穢是大捨相，如來如實覺為無相。餘絕分是十八佛不共法相，如來如實覺為無相。能嚴飾是相好相，如來如實覺為無相。能憶念是無忘失法相，如來如實覺為無相；無所執是恒住捨性相，如來如實覺為無相；……現等別覺是一切相智相，如來如實覺為無相。」(大正 7, 232a13-b2)

**二、結：佛得一切諸法無相，名無礙智**

如是，諸天子！佛得一切諸法無相，以是因緣故，佛名無礙智。」<sup>51</sup>

**【論】**

**壹、明深般若相**

**（壹）明諸天子何以復問「般若相」**

問曰：上處處已說「空、無相、無作乃至無起<sup>52</sup>、無所有<sup>53</sup>是般若相」，<sup>54</sup>今諸天子何以復問「何等是般若相」？

答曰：

**一、般若相不定故，諸天問「何者定是般若相」**

佛雖處處說般若波羅蜜——或說空等、或說有、或說果報<sup>55</sup>、或說罪福<sup>56</sup>，<sup>57</sup>不定故，是以今問「何者定是般若相」。

**二、諸天不能了知故問**

復次，是般若波羅蜜如幻化，如似可得，而無定相可取，唯諸佛能正遍知其相；諸天子雖有利智，不能了知故問。

**三、後來者未聞故問**

復次，有人言：是諸天子有後來者，不聞，故問。

**（貳）佛答**

**一、正說般若相**

佛答諸天子：「空等是般若波羅蜜相。」

(1)「空相」者，內外空等諸空。

(2)若諸法空者，即是無有男女、長短、好醜等相，是名「無相相」。

(3)若空、無相，不復生願著後世身，是名「無作相」。

三解脫門是初入般若波羅蜜相，三乘共有。

(5)不生不滅、(6)不垢不淨、(9)無所依止、(10)虛空等，是般若波羅蜜深相。

<sup>51</sup> 《大般若波羅蜜多經》卷 443〈47 示相品〉：「諸天當知！一切如來、應、正等覺於如是等一切法相，皆能如實覺為無相，是故我說一切如來、應、正等覺智見無礙無與等者。」（大正 7，232b2-5）

<sup>52</sup> 《正觀》（6），p.181：《大智度論》卷 64〈42 歎淨品〉（大正 25，509b22-28）。

<sup>53</sup> 《正觀》（6），p.181：《大智度論》卷 64〈43 無作實相品〉（大正 25，510b19-23）。

<sup>54</sup> 《正觀》（6），p.181：《大智度論》卷 43（大正 25，370a25-b21）、卷 54（大正 25，444a28-15）、卷 55（大正 25，454b1-8）。

<sup>55</sup> 《正觀》（6），p.181：《大智度論》卷 56〈30 顧視品〉（大正 25，457a6-460a26）、卷 60〈38 校量法施品〉（大正 25，481b19-486a21）。

<sup>56</sup> 《正觀》（6），p.181：《大智度論》卷 62〈41 信謗品〉（大正 25，500c15-501b5）、卷 70〈49 問相品〉（大正 25，548b29-c2）。

<sup>57</sup> 或說空  
| 或說有  
佛說般若 | 或說果報  
└ 或說罪福

（印順法師，《大智度論筆記》〔B018〕p.145）

上三解脫門中<sup>(2)</sup>「無相」——無男女等外相；

<sup>(7)</sup>「無所有」下<sup>(8)</sup>「無相相」——無一切法相。

空雖是一，人根有利鈍、(548c)人有深淺故，差別說空。<sup>58</sup>

「無生無滅」等論議，如先說。<sup>59</sup>

## 二、說諸般若相之法：以世諦說，非第一義

### (一) 以世俗諦說

佛知天子必有如是念：「若般若波羅蜜空、無所有、如虛空相，云何可說？若說，即是有相。」

諸天子以佛威德大故，不敢致難，是故佛自為說：「佛憐愍眾生，以世諦故說空等諸相，非以第一義諦。」

若以第一義故，應難；以世諦故說，則不應難。<sup>60</sup>

### (二) 不著心取相說

復次，雖說「空」，不以著心取相，不示法若是、若非，一切法同一相、無分別，是故復了了說，所謂「無所有」、「如虛空相」。

## 三、深般若諸相，世間無能壞者

### (一) 標義

無有一法不入此相者，是故說「一切世間無能破壞」。

### (二) 釋因由

何以故？

#### 1、世間天人等亦是相故

「一切世間天、人、阿修羅即是相故。」

若異法相違，則有可破；如水能滅火，火不自滅火。

口言如實欲破者，竟不能破，何況不實者？譬如盲人蹈踐珍寶，口言非珍寶，竟<sup>61</sup>不能令非珍寶。

#### 2、相不能破相，相不能知相；相不能知無相，無相不能知相

##### (1) 釋「相不能破相」

<sup>58</sup> 空、無相、無作——淺——三乘共  
般若相——不生滅垢淨，無依止，虛空相——深——大乘不共

(印順法師，《大智度論筆記》[B025] p.161)

<sup>59</sup> (1) 《正觀》(6)，p.181：《大智度論》卷 1 (大正 25，60b19-c6)、卷 15 (170b29-171b15)、卷 17 (189b4-24)、卷 22 (222b27-c16)、卷 31 (287c6-18)、卷 35 (319a13-18)、卷 52 (433c2-9)、卷 53 (439b1-13)。

(2) 另參見《大智度論》卷 20 (大正 25，207b5-15)、卷 22 (222c5-6)、卷 31 (292c2-24)、卷 35 (318a17-22)、卷 37 (331b17-19)、卷 45 (385a8-11)、卷 46 (396b5-6)、卷 51 (424c3-4)、卷 52 (434a12-15)、卷 53 (438c5-6)、卷 55 (449c13-22)、卷 59 (479b16-29)、卷 60 (484b14-15)、卷 62 (500a5-6)、卷 63 (508b20-26)、卷 64 (512a8-12) 等。

<sup>60</sup> 二諦：建立於世間語言；無俗則無真；二諦皆有。(印順法師，《大智度論筆記》[E002] p.286)

<sup>61</sup> 竟：6.終於，到底。(《漢語大詞典》(八)，p.385)



**A、般若畢竟空無相故**

此中佛更說：般若波羅蜜畢竟空無相故，「相不能破相」。

**B、諸法和合，無所破、無所失故**

復次，有人言：「相不能破相」者，有法能解散，諸法和合，竟無所破、無所失；如斧析薪，分分解散，竟無所失。

**C、諸法無定相故無所破**

復次，諸法無定相，如樹，根、莖、枝、葉和合故名為樹，樹無定相故無所破。如是等，名為「相不能破相」。

**(2) 釋「相不能知相」**

問曰：色等諸法非覺故，可不<sup>62</sup>相知；心數法是知相，云何言「不知」？

答曰：此中以實相故，不說如凡夫人虛妄知。

是智慧，有為法故，因緣和合生，虛妄法不能實有所知，是故捨，入無餘涅槃。

若智慧知常、無常乃至空、寂滅等，上來已廣破，滅、無所有。<sup>63</sup>

若如是者，云何當有知？

以是故「相不知相」。

**(3) 釋「相不能知無相」**

「相不能知無相」者，內雖有智慧，外空故無法（549a）可知；外無緣云何智慧生？是故言「相不能知無相」。譬如刀雖利，不能破空。

**(4) 釋「無相不能知相」**

「無相不能知相」者，有人言：內智慧無定相，外所緣法有定相，心隨緣而生，是故說「無相不應知相」。譬如無刀，雖有物，無刀可斫。

**(5) 明「相、無相、相無相皆不可得」**

「是相、是無相、相無相皆不可得」者。

**A、第一說**

「相」不入「相」。何以故？先有相故。

「相」不入「無相」。何以故？相無入處故。

離是「相」、「無相」，更無處可入。

**B、第二說**

復次，「相」、「所相」法不定故，因「所相」故有「相」。所以者何？

若先有「相」，無「所相」者則無「相」，無所因故。

若先有「所相」而無「相」者，云何有「所相」？無所因待故。

**C、第三說**

復次，「相」以「所相」不定，「相」或時作「所相」，「所相」或時是「相」。

<sup>62</sup> 可不 = 不可【元】【明】。（大正 25，548d，n.23）

<sup>63</sup> 《正觀》（6），p.182：《大智度論》卷 42（大正 25，365a29-b3）、卷 70（大正 25，550c24-26）。

是故「相」不定、不實故，「所相」亦無；若「所相」不定、不實故，「相」亦無。  
是故說「是相、是無相、是相無相不可得」。<sup>64</sup>

#### 四、明空等諸相是實，佛得如實相故名為如來

##### (一) 正說空等諸相非諸法、人、非人等所作

如先說空等諸相是實。何以故？

是相非五眾所作，非六波羅蜜乃至一切種智所作。

是相，無為故，無法可作，亦無若人若非人能作。

「人」者，菩薩、諸佛等；「非人」者，諸天等。

是相畢竟空故，非有漏非無漏，非世間非出世間。

先雖說無為相，但破有為故說無為，無為亦無定相。<sup>65</sup>

##### (二) 舉喻

此中佛欲使是事明了，故說譬喻。

<sup>64</sup> (1) 《中論》卷 1〈5 觀六種品〉(大正 30, 7b16-c10)：

於無相法中，相則無所相；有相無相中，相則無所住；離有相無相，餘處亦不住。

相法無有故，可相法亦無；可相法無故，相法亦復無；

是故今無相，亦無有可相；離相可相已，更亦無有物。

(2) 印順法師，《中觀論頌講記》，pp.126-128：

**於無相法中，相則無所相；有相無相中，相則無所住；離有相無相，餘處亦不住。**

一般人的認識中，都覺得相與所相，有能所體相的差別，所以起自性實有的差別執。現在再從所相法難破他的能相。所執的虛空所相法，是有相呢？還是無相？假定說虛空的法體是無相法，上面說過，無相法根本不存在，存在的必然有相。那麼，能相是為所相法作相的，現在所相的虛空既然不可得，在不可得的「無相法中」，無礙性的能「相」，不是沒有「所相」法可以為他作相了嗎？如裝穀物的麻袋，有一袋袋的所相法在那兒，才可以貼上一號二號的或米或麥或豆的能相條子，作為他的標記。如根本沒有所相的穀物麻袋，那你一號二號的能相封條，不是無可張貼了嗎？所以，所相的法體，不但不能說他是「有相」——本身已有了相，那還要能相做什麼？並且本來已有了一相，再有一能相的無礙性，也沒有所住處，實有的兩相，是不能並存的。也不能說他是「無相」，無相就等於不存在，不存在的無相法，那能「相」的無礙性也還是「無所住」著的。假定說，所相的法體，不是有相，也不是無相，離有無相，另有個第三者。這也不對！凡有法體的，不是有相，就是無相，所以說「離」開了「有相無相」，更找「不」出一個其「餘」第三者，可為能相的所「住」。

**相法無有故，可相法亦無；可相法無故，相法亦復無；**

**是故今無相，亦無有可相，離相可相已，更亦無有物。**

有的以為虛空的法體是常時存在的，不過要離去物質才顯出他的無礙相，這等於承認二者的可離性。不知相法與可相法，是相待共存而不能獨立存在的，虛空與無礙性，那裡可以分離！所以要有無礙性的能相，才有虛空的相法，假使無礙的能「相法無有」，那「可相」的虛空「法」，也就「無」有。反過來說：要有虛空的相法，才有無礙性的能相，假使「可相」的虛空「法」是「無」，那麼，能「相」的無礙「法」自然「亦復無」有了。這兩者既然是因緣的存在，就都沒有自性，「是故」，現「今無」有「相」法，也「無有可相」法，「離」了這「相可相」法以外，還有什麼東西是虛空呢？所以說：「更亦無有物」。物，是實有自體的東西。虛空是這樣，其他的一切法，也是這樣。因為一切法，不出相與可相的二法，相可相的二法不可得，一切法也就都沒有自體了。

<sup>65</sup> 無為：但破有為說無為，無為無實。(印順法師，《大智度論筆記》〔E005〕p.295)

### （三）釋疑

聽者作是念：「若無佛則不聞<sup>66</sup>是相，佛於眾生最上故，應當作是相。」  
是故佛語諸天：「有佛、無佛，此相常住。佛能知是相，故名爲佛。」

### （參）諸天悟解

#### 一、佛得無相故，成就無礙智

爾時，諸天子歡喜，復白佛言：「世尊！是諸相甚深，雖不可取相而可行，能與人無上果報。佛得是相故，於一切法得無礙智。」

若分別諸法有定相，則是有礙智。

#### 二、住諸法實相中，能說各各別相

「世尊住是諸法實（549b）相中，則通達無礙，能說諸法各各別相——所謂惱壞相是色相，乃至了現<sup>67</sup>知者是一切種智相。」<sup>68</sup>

### （肆）佛述成

佛可其意，爲分別諸相。

凡夫所知，諸相各異；佛知<sup>69</sup>皆是空相——空相即是無相，佛得是無相。

「得」者，是知，<sup>70</sup>無比遍知故名「得」。

是諸法相，今轉名「般若波羅蜜」故。

### 【經】

#### 貳、明佛知般若恩故報恩

#### （壹）般若能生諸佛、能示世間實相，故爲佛所尊重

##### 一、佛知般若恩故，依止尊重般若而住

爾時，佛告須菩提：「般若波羅蜜是諸佛母；般若波羅蜜能示世間相，是故佛依止是法住<sup>71</sup>，供養、恭敬、尊重、讚歎是法。何等是法？所謂般若波羅蜜。諸佛依止般若波羅蜜住，恭敬、供養、尊重、讚歎是般若波羅蜜。何以故？是般若波羅蜜出生諸佛。<sup>72</sup>

##### 二、知恩報恩中，佛最第一

#### （一）標宗

佛知作人。若人正問知作人者，正答無過於佛。<sup>73</sup>

<sup>66</sup> 聞=應【石】。（大正 25，549d，n.3）

<sup>67</sup> 了現=現了【元】【明】【石】，=現子【聖】。（大正 25，549d，n.7）

<sup>68</sup> 無礙：空無定相故無礙。（印順法師，《大智度論筆記》〔E009〕p.302）

<sup>69</sup> 知=智【聖】。（大正 25，549d，n.8）

<sup>70</sup> 知=智【石】。（大正 25，549d，n.10）

<sup>71</sup> 住=行【宋】【宮】【聖】。（大正 25，549d，n.12）

<sup>72</sup> 《大般若波羅蜜多經》卷 443〈47 示相品〉：

爾時，世尊告具壽善現曰：「善現當知！甚深般若波羅蜜多是諸佛母，甚深般若波羅蜜多能示世間諸法實相，是故如來、應、正等覺依法而住，供養恭敬、尊重讚歎、攝受護持所依住法，此法即是甚深般若波羅蜜多。一切如來、應、正等覺無不依止甚深般若波羅蜜多，供養恭敬、尊重讚歎、攝受護持。何以故？善現！一切如來、應、正等覺，皆因如是甚深般若波羅蜜多而得生長。甚深般若波羅蜜多與諸如來、應、正等覺作所依處，能示世間諸法實相。」（大正 7，232b6-16）

<sup>73</sup> 《大般若波羅蜜多經》卷 443〈47 示相品〉：

一切如來正等覺者，是知恩者、能報恩者。若有問言：「誰是知恩、能報恩者？」應正答言：

**(二) 釋因由**

何以故？

**1、乘如是乘，行如是道而得無上菩提故**

須菩提！佛知作人故。佛所乘來法、佛所從來道，得阿耨多羅三藐三菩提。是乘、是道，佛還恭敬、供養、尊重、讚歎、受持、守護。須菩提！是名佛知作人。<sup>74</sup>

**2、知一切法無作相故**

復次，須菩提！佛知一切法無作相，作者無所有故；一切法無起，形事不可得故。須菩提！佛因般若波羅蜜知一切法無作相。亦以是因緣故，佛知作人。<sup>75</sup>

**三、般若能生諸佛、能示世間相****(一) 一切法無所得，無知者、無見者故，般若能生諸佛、能示世間相****1、正說**

復次，須菩提！佛因般若波羅蜜得一切法不生，以無所得故。以是因緣故，般若波羅蜜能生諸佛，亦能示世間相。」<sup>76</sup>

**2、釋難****(1) 須菩提難：一切法無知者、見者，云何般若能生諸佛、能示世間相**

須菩提言：「世尊！若一切法無知者、無見者，云何般若波羅蜜能生諸佛、能示世間相？」<sup>77</sup>

**(2) 佛答****A、一切法空、虛誑、不堅固故無知者、無見者**

佛告須菩提：「如是！如是！一切法實無知者、無見者。<sup>78</sup>

「佛是知恩、能報恩者。」問：「何以故？」「一切世間知恩、報恩無過佛故。」（大正 7，232b16-22）

<sup>74</sup> 《大般若波羅蜜多經》卷 443〈47 示相品〉：

時，具壽善現白佛言：「世尊！云何如來、應、正等覺知恩報恩？」

佛言：「善現！一切如來、應、正等覺乘如是乘、行如是道，來至無上正等菩提；得菩提已，於一切時供養恭敬、尊重讚歎、攝受護持是乘、是道，常無暫廢——此乘此道當知即是甚深般若波羅蜜多。善現！是名如來、應、正等覺知恩報恩。」（大正 7，232b19-26）

<sup>75</sup> 《大般若波羅蜜多經》卷 443〈47 示相品〉：「復次，善現！一切如來、應、正等覺無不皆依甚深般若波羅蜜多覺一切法皆無作用，以能作者無所有故；一切如來、應、正等覺無不皆依甚深般若波羅蜜多覺一切法無所成辦，以諸形質不可得故。善現！以諸如來、應、正等覺知依如是甚深般若波羅蜜多覺一切法皆無作用、無所成辦，於一切時供養恭敬、尊重讚歎，攝受護持曾無間斷，故名真實知恩報恩。」（大正 7，232b26-c5）

<sup>76</sup> 《大般若波羅蜜多經》卷 443〈47 示相品〉：「復次，善現！一切如來、應、正等覺無不皆依甚深般若波羅蜜多，於一切法無作、無成、無生智轉，復能知此無轉因緣。是故，應知甚深般若波羅蜜多能生如來、應、正等覺，亦能如實示世間相。」（大正 7，232c5-9）

<sup>77</sup> 《大般若波羅蜜多經》卷 443〈47 示相品〉：

爾時，具壽善現白佛言：「世尊！如來常說一切法性無生、無起、無知、無見，如何可說甚深般若波羅蜜多能生如來、應、正等覺，能示世間諸法實相？」（大正 7，232c10-13）

<sup>78</sup> 《大般若波羅蜜多經》卷 443〈47 示相品〉：

佛告善現：「如是！如是！如汝所說。一切如來、應、正等覺說一切法無生、無起、無知、無見。依世俗說甚深般若波羅蜜多能生如來、應、正等覺，亦能如實示世間相。」（大正 7，232c13-16）

云何無知者、無見者？

一切法空、虛誑、不堅固，是故一切法無知者、無見者。<sup>79</sup>

### **B、諸法無依止、無繫故無知者、無見者**

復次，須菩提！一切法云何無知者、無見者？一切法無依止、無所繫，以是故，一切法無（549c）知者、無見者。

### **C、結**

如是，須菩提！般若波羅蜜能生諸佛、能示世間相。<sup>80</sup>

## **(二) 不緣境生識，不見諸法故，般若能示世間相**

### **1、佛說**

不見色故示世間相，不見受、想、行、識故示世間相，乃至不見一切種智故，示世間相。

如是，須菩提！般若波羅蜜能生諸佛、能示世間相。」<sup>81</sup>

### **2、須菩提重難**

須菩提言：「世尊！云何不見色故，般若波羅蜜示世間相？不見受、想、行、識乃至一切種智故，示世間相？」<sup>82</sup>

### **3、佛答：不緣境生識故不見色等諸法**

佛告須菩提：「若不緣色生識，是名不見色相故示；不緣受、想、行、識生識，乃至不緣一切種智生識，是名不見一切種智相故示。

如是，須菩提！是深般若波羅蜜能生諸佛、能示世間相。<sup>83</sup>

<sup>79</sup> 《大般若波羅蜜多經》卷 443〈47 示相品〉：

時，具壽善現白佛言：「世尊！云何諸法無生、無起、無知、無見？」

佛言：「善現！以一切法空無所有，皆不自在、虛誑不堅故，一切法無生、無起、無知、無見。」（大正 7，232c16-20）

<sup>80</sup> 《大般若波羅蜜多經》卷 443〈47 示相品〉：「復次，善現！一切法性無所依止，無所繫屬，由此因緣，無生、無起、無知、無見。善現當知！甚深般若波羅蜜多雖生如來、應、正等覺，亦能示現世間實相，而無所生亦無所示。」（大正 7，232c20-23）

<sup>81</sup> 《大般若波羅蜜多經》卷 443〈47 示相品〉：「善現當知！甚深般若波羅蜜多，不見色故，名示色相；不見受、想、行、識故，名示受、想、行、識相。……不見諸佛無上正等菩提故，名示諸佛無上正等菩提相。不見一切智故，名示一切智相；不見道相智、一切相智故，名示道相智、一切相智相。善現！由如是義，甚深般若波羅蜜多能示世間諸法實相，名如來母能生如來。」（大正 7，232c23-233b26）

<sup>82</sup> 《大般若波羅蜜多經》卷 443〈47 示相品〉：

爾時，具壽善現白佛言：「世尊！云何如是甚深般若波羅蜜多不見色故，名示色相；不見受、想、行、識故，名示受、想、行、識相？如是乃至不見一切智故，名示一切智相；不見道相智、一切相智故，名示道相智、一切相智相？」（大正 7，233b27-c2）

<sup>83</sup> 《大般若波羅蜜多經》卷 443〈47 示相品〉：

佛告善現：「甚深般若波羅蜜多，由不緣色而生於識，是為不見色故，名示色相；不緣受、想、行、識而生於識，是為不見受、想、行、識故，名示受、想、行、識相。如是乃至由不緣一切智而生於識，是為不見一切智故，名示一切智相；不緣道相智、一切相智而生於識，是為不見道相智、一切相智故，名示道相智、一切相智相。善現！由如是義，甚深般若波羅蜜多能示世間諸法實相，名如來母能生如來。」（大正 7，233c2-11）

**〔貳〕正明般若能示佛世間空、不可思議等諸相**

復次，須菩提！般若波羅蜜云何能生諸佛、能示世間相？

**一、明般若示世間空**

須菩提！般若波羅蜜能示世間空。云何示世間空？

**〔一〕正說世間空**

示五眾世間空，示十二入世間空，示十八界世間空，示十二因緣世間空，示我見根本六十二見世間空；

示十善道世間空，示四禪、四無量心、四無色定世間空；

示三十七品世間空，示六波羅蜜世間空；

示內空世間空，示外空世間空，示內外空世間空；

示無法空世間空，示有法空世間空，示無法有法空世間空；

示有為性世間空，示無為性世間空；

示佛十力世間空，示十八不共法世間空，乃至示一切種智世間空。

如是，須菩提！般若波羅蜜能生諸佛、能示世間相。<sup>84</sup>

**〔二〕佛因般若示、知、覺、思惟、分別世間空**

復次，須菩提！佛因般若波羅蜜示世間空、知世間空、覺世間空、思惟世間空、分別世間空。

如是，須菩提！般若波羅蜜能生諸佛、能示世間相。<sup>85</sup>

**〔三〕結：般若示佛世間空——示五眾乃至一切種智世間空**

復次，須菩提！般若波羅蜜示佛世間空。云何示佛世間空？示五眾世間空，乃(550a)至示一切種智世間空。

如是，須菩提！般若波羅蜜能生諸佛、能示世間相。<sup>86</sup>

<sup>84</sup> 《大般若波羅蜜多經》卷 443〈47 示相品〉：

時，具壽善現白佛言：「世尊！云何如是甚深般若波羅蜜多能為如來顯世間空？」

佛言：「善現！甚深般若波羅蜜多能為如來顯色世間空，顯受、想、行、識世間空；……顯一切菩薩摩訶薩行世間空，顯諸佛無上正等菩提世間空；顯一切智世間空，顯道相智、一切相智世間空。善現！由如是義，甚深般若波羅蜜多能示如來世間實相，名如來母能生如來。」(大正 7，233c13-234a17)

<sup>85</sup> 《大般若波羅蜜多經》卷 443〈47 示相品〉：「復次，善現！一切如來、應、正等覺依深般若波羅蜜多能為世間顯色世間空，顯受、想、行、識世間空，如是乃至顯一切智世間空，顯道相智、一切相智世間空，令諸世間受世間空、想世間空、思世間空、了世間空。善現！由如是義，甚深般若波羅蜜多能示如來、應、正等覺世間實相，名如來母能生如來。」(大正 7，234a18-24)

<sup>86</sup> 《大般若波羅蜜多經》卷 443〈47 示相品〉：「復次，善現！甚深般若波羅蜜多能使如來、應、正等覺見世間空。見何等世間空？謂見色世間空，見受、想、行、識世間空，如是乃至見一切智世間空，見道相智、一切相智世間空。善現！由如是義，甚深般若波羅蜜多能示如來、應、正等覺世間實相，名如來母能生如來。」(大正 7，234a24-b1)

## 二、示佛世間不可思議

復次，須菩提！般若波羅蜜示佛世間不可思議。云何示世間不可思議？示五眾世間不可思議，乃至示一切種智世間不可思議。<sup>87</sup>

## 三、示佛世間離

復次，須菩提！般若波羅蜜示佛世間離。云何示世間離？示五眾世間離，乃至示一切種智世間離。如是，須菩提！般若波羅蜜示佛世間離。

## 四、示佛世間寂滅

復次，須菩提！般若波羅蜜示佛世間寂滅。云何示世間寂滅？示五眾世間寂滅，乃至示一切種智世間寂滅。

## 五、示佛世間畢竟空

復次，須菩提！般若波羅蜜示佛世間畢竟空。云何示世間畢竟空？示五眾世間畢竟空，乃至示一切種智世間畢竟空。

## 六、示佛世間性空

復次，須菩提！般若波羅蜜示佛世間性空。云何示世間性空？示五眾世間性空，乃至示一切種智世間性空。<sup>88</sup>

## 七、示佛世間無法空

復次，須菩提！般若波羅蜜示佛世間無法空。云<sup>89</sup>何示世間無法空，示五眾世間無法空，乃至示一切種智世間無法空。<sup>90</sup>

<sup>87</sup> 《大般若波羅蜜多經》卷 443〈47 示相品〉：

「復次，善現！甚深般若波羅蜜多能示如來、應、正等覺世間不可思議相，名如來母能示如來世間實相。」

時，具壽善現白佛言：「世尊！云何如是甚深般若波羅蜜多能示如來、應、正等覺世間不可思議相？」

佛言：「善現！甚深般若波羅蜜多能示如來、應、正等覺色世間不可思議相，受、想、行、識世間不可思議相，如是乃至一切智世間不可思議相，道相智、一切相智世間不可思議相。善現！由如是義，甚深般若波羅蜜多能示如來、應、正等覺世間實相，名如來母，能生如來。」（大正 7，234b1-12）

<sup>88</sup> 《大般若波羅蜜多經》卷 443〈47 示相品〉：

「復次，善現！甚深般若波羅蜜多能示如來、應、正等覺世間自性空相，名如來母，能示如來世間實相。」

時，具壽善現白佛言：「世尊！云何如是甚深般若波羅蜜多能示如來、應、正等覺世間自性空相？」

佛言：「善現！甚深般若波羅蜜多能示如來、應、正等覺色世間自性空相，受、想、行、識世間自性空相，如是乃至一切智世間自性空相，道相智、一切相智世間自性空相。善現！由如是義，甚深般若波羅蜜多能示如來、應、正等覺世間實相，名如來母能生如來。」（大正 7，234c23-235a4）

<sup>89</sup> 《大正藏》原作「示」，今依《高麗藏》作「云」（第 14 冊，1075a20）。

<sup>90</sup> 《大般若波羅蜜多經》卷 443〈47 示相品〉：

「復次，善現！甚深般若波羅蜜多能示如來、應、正等覺世間無性空相，名如來母，能示如

**八、示佛世間無法有法空**

復次<sup>91</sup>，須菩提！般若波羅蜜示佛世間無法有法空。云何示世間無法有法空？示五眾世間無法有法空，乃至示一切種智世間無法有法空。<sup>92</sup>

**九、示佛世間獨空**

復次，須菩提！般若波羅蜜示佛世間獨空。云何示世間獨空？示五眾世間獨空，乃至示一切種智世間獨空。

如是，須菩提！般若波羅蜜能生諸佛、能示世間相。<sup>93</sup>

**十、示世間非今世後世相**

復次，須菩提！是深般若波羅蜜示世間相，所謂不生今世、後世相。何以故？諸法無可用生今世、後世相故。」<sup>94</sup>

【論】釋曰：

**貳、明佛知般若恩故報恩****（壹）般若能生諸佛、能示世間實相，故為佛所尊重****一、佛知般若恩故，依止尊重般若而住**

般若波羅蜜是諸佛母，是因緣故，諸佛依止般若波羅蜜住。

來世間實相。」

時，具壽善現白佛言：「世尊！云何如是甚深般若波羅蜜多能示如來、應、正等覺世間無性空相？」

佛言：「善現！甚深般若波羅蜜多能示如來、應、正等覺色世間無性空相，受、想、行、識世間無性空相，如是乃至一切智世間無性空相，道相智、一切相智世間無性空相。善現！由如是義，甚深般若波羅蜜多能示如來、應、正等覺世間實相，名如來母能生如來。」（大正 7，234c13-23）

<sup>91</sup>（復次，須菩提！般若波羅蜜示佛世間有法空。云何示佛世間有法空？示五眾世間有法空，乃至一切種智世間有法空。）+復【聖】。（大正 25，550d，n.3）

<sup>92</sup>《大般若波羅蜜多經》卷 443〈47 示相品〉：

「復次，善現！甚深般若波羅蜜多能示如來、應、正等覺世間無性自性空相，名如來母，能示如來世間實相。」

時，具壽善現白佛言：「世尊！云何如是甚深般若波羅蜜多能示如來、應、正等覺世間無性自性空相？」

佛言：「善現！甚深般若波羅蜜多能示如來、應、正等覺色世間無性自性空相，受、想、行、識世間無性自性空相，如是乃至一切智世間無性自性空相，道相智、一切相智世間無性自性空相。善現！由如是義，甚深般若波羅蜜多能示如來、應、正等覺世間實相，名如來母能生如來。」（大正 7，235a4-15）

<sup>93</sup>《大般若波羅蜜多經》卷 443〈47 示相品〉：

時，具壽善現白佛言：「世尊！云何如是甚深般若波羅蜜多能示如來、應、正等覺世間純空相？」

佛言：「善現！甚深般若波羅蜜多能示如來、應、正等覺色世間純空相，受、想、行、識世間純空相，如是乃至一切智世間純空相，道相智、一切相智世間純空相。善現！由如是義，甚深般若波羅蜜多能示如來、應、正等覺世間實相，名如來母能生如來。」（大正 7，235a17-25）

<sup>94</sup>《大般若波羅蜜多經》卷 443〈47 示相品〉：「復次，善現！甚深般若波羅蜜多能示如來、應、正等覺世間相者，謂令不起此世間想，亦令不起他世間想。所以者何？以一切法皆無所有實不可得，無可依彼起此世間、他世間想。」（大正 7，235b6-10）



餘經中說：「諸佛依止（550b）法，以法為師。」<sup>95</sup>

佛此中告須菩提：「法者，即是般若波羅蜜。」

## 二、知恩報恩中，佛最第一

### （一）佛知般若恩故，雖為三界尊，尚供養般若

一切不善法中無過邪見，邪見故不識恩分，「我自然應爾。」

知恩者，諸世間善法中最上，能與今世好名聲，後與上妙果報。

是故佛自說知恩、報恩中第一，「我尚知布施、持戒等恩，何況般若波羅蜜！」

復次，諸天子作是念：「般若波羅蜜畢竟空無定相故，或有人不貪不貴。」

是故佛說：「我為三界尊，尚供養般若波羅蜜，何況餘人！」

復有人生疑：「佛於一切世間如虛空無所著，何以故貪是般若波羅蜜，尊重、供養，似如貪著？」

是故佛說：「我無貪心，但分別知諸法好醜、力用多少；知是般若波羅蜜能斷一切戲論、開三乘道、能滅眾苦等，有無量無邊功德，是故讚歎、尊重、供養。」

譬如人行安穩道，免諸患難，常念此道以示於人。

### （二）佛因般若知一切法無作相，佛知般若恩故說「佛知作人」

「佛知作人」者，知他作恩於己<sup>96</sup>。

餘處說「佛不知作人」，恐人疑，是故說：「佛知一切法無作相。」

知一切法無作相故言「無作人」，不以不知恩分故名「不知作人」。

言「知作人」、「不知作人」，無咎。

## 三、般若能生諸佛、能示世間相

### （一）一切法無所得，無知者、無見者故，般若能生諸佛、能示世間相

#### 1、須菩提難：一切法無知者、見者，云何般若能生諸佛、能示世間相

爾時，須菩提以畢竟空難：「世尊！若一切法畢竟空故，無知者、無作者，云何般若波羅蜜能生諸佛、能示諸佛世間？」

<sup>95</sup> (1)《雜阿含經》卷 44 (1188 經)：

佛住鬱毘羅聚落尼連禪河側菩提樹下，成佛未久。爾時，世尊獨靜思惟，……復作是念：「無有諸天、魔、梵、沙門、婆羅門、天神、世人能於我所戒具足勝、三昧勝、智慧勝、解脫勝、解脫知見勝，令我恭敬宗重，奉事供養，依彼而住者。唯有正法令我自覺，成三藐三佛陀者，我當於彼恭敬宗重，奉事供養，依彼而住。所以者何？過去如來、應、等正覺亦於正法恭敬宗重，奉事供養，依彼而住；諸當來世如來、應、等正覺亦於正法恭敬宗重，奉事供養，依彼而住。」(大正 2，321c18-322a7)

(2) 另參見《大方便佛報恩經》卷 6 (大正 3，157b12-16)；《佛說自誓三昧經》(大正 15，344c24-25)；《佛說如來獨證自誓三昧經》(大正 15，347a27-28)；《正法念處經》卷 61 (大正 17，359a25-27)；《大智度論》卷 10 (1 序品)(大正 25，128c26-27)。

<sup>96</sup> (1)《高麗藏》作「已」(第 14 冊，1075c9)。

(2) 印順法師，《大智度論》(標點本)，p.2601 作「己」。

(3)《大正藏》原作「已」，今依印順法師《大智度論》(標點本)作「己」。

## 2、佛答

### (1) 一切法空、虛誑、不堅固故無知者、無見者

佛可其問，此中自說因緣：「一切法空、虛誑、無堅固。」

須菩提意：「一切法鈍相，無見、無知，云何般若波羅蜜獨能知見？」

佛意：「一切法非但無知、無見；一切法空、不牢固，無知者、無見者，亦不可得，故不應難。」

### (2) 諸法無依止、無繫故無知者、無見者

復次，一切法無所依止、無繫故，無知者、無見者。

種種門破諸法令空——或破常，行無(550c)常入空；或破實入空；或畢竟盡故入空；或一切法遠離故入空——如是等入空。

今以一切法無住處故，無依止、無繫；無依止故，亦無生滅；以是故即是空。

「不繫」者，一切法實相不繫，出三界。所以者何？三界虛誑故。

### (3) 結

是以一切法無知者、無見者，如是「示世間」。

## (二) 不緣境生識，不見諸法故，般若能示世間相

是般若不見色等諸法故「示世間」。

### 1、論主釋：色等法無依止、無繫、虛誑故不見

色等法無依止、無繫、虛誑故「不見」。

### 2、佛說：不緣境生識故不見色等諸法

此中佛自說不見因緣，所謂「不生緣色識，乃至不生緣一切種智識，是名不見色等法。」

### ※ 因論生論：識可不生，色云何不生

問曰：識可不生，色云何不生？

答曰：惱壞相是色，因識故分別知；無識，亦無惱壞相。

復次，一切諸法從因緣和合故生相，無有自性。如有身、識、觸諸緣和合故知地堅相，堅相不離身、識。是故諸法皆由和合生，無有自性。

## (貳) 正明般若能示佛世間空、不可思議等諸相

### 一、般若示世間空

#### (一) 正說世間空

「般若波羅蜜示世間空」者，

「世間」名五眾乃至一切種智。

菩薩行般若波羅蜜時，觀是法若大若小、若內若外無不空者，是名「般若波羅蜜示世間空」。

### （二）佛因般若示、知、覺、思惟、分別世間空

「佛示世間空」者，

或有人疑：「佛愛著法故，說般若波羅蜜示世間空，非是諸法常實相。」

是故佛說：「我非愛法故說。佛知諸法相，本末籌量、思惟、分別，無有法出於空者。我非但讀誦、從他聞故說，我以內心覺、知、思惟、分別故，說示世間空。」

### （三）結：般若示佛世間空——示五眾乃至一切種智世間空

此一段說「示世間空」者，上廣說「離六十二見」等<sup>97</sup>，今但說「五眾乃至一切種智」。

### 二、示佛世間不可思議

時會者謂般若波羅蜜是畢竟空，心想取著，是故說「不可思議」。

「不可思議」者，畢竟空亦不可得。

### 三、示佛世間離，四、示佛世間寂滅

「畢竟空」，或名「離」、或名「寂滅」。

「離」名分散，諸法久後無（551a）遺餘，又自離其性。

知畢竟空已，無心數法、無語言故，名「寂滅」。

### 五~八、示佛世間畢竟空、性空、無法空、無法有法空

畢竟空等，如先說。<sup>98</sup>

### 九、示佛世間獨空——辨「獨空」義

問曰：云何是獨空？

答曰：

#### （一）無因無待故名獨空

十八空皆因緣相待，如內空因內法故名內空；若無內法，則無內空。十八空皆爾。是獨空無因無待，故名「獨空」。

#### （二）如虛空、涅槃名獨空

復次，「獨空」者，如虛空、如、法性、實際、涅槃。

### 十、示世間非今世相非後世相

#### （一）論主釋：般若離斷常二邊說中道

「示世間非今世相、非後世相」者，

有諸外道但說今世，不說後世——是人邪見，墮斷滅中。

<sup>97</sup> 參見《大智度論》卷 70〈49 問相品〉：「須菩提！般若波羅蜜能示世間空。云何示世間空？示五眾世間空，示十二入世間空，示十八界世間空，示十二因緣世間空，示我見根本六十二見世間空；示十善道世間空，示四禪、四無量心、四無色定世間空；示三十七品世間空，示六波羅蜜世間空；示內空世間空，示外空世間空，示內外空世間空，示無法空世間空，示有法空世間空，示無法有法空世間空；示有為性世間空，示無為性世間空；示佛十力世間空，示十八不共法世間空，乃至示一切種智世間空。如是，須菩提！般若波羅蜜能生諸佛，能示世間相。」（大正 25，549c13-24）

<sup>98</sup> 《正觀》（6），p.182：《大智度論》卷 1（大正 25，289b26-290c26）、卷 70（大正 25，552a1-2）。

有人說今世、後世，言：「今世神入後世。」——是人邪見，墮常中。

般若波羅蜜離二邊，說中道——雖空而不著空故，為說罪福；雖說罪福，不生常邪見，亦於空無礙。

**（二）依經意：一切法畢竟空，云何有今世、後世見**

此中佛自說因緣：「此中畢竟空故，云何有今世、後世見——若斷、若常？」

**【經】**

**參、歎般若能成大事**

**（壹）明般若依五事故起**

**一、須菩提正歎**

須菩提白佛言：「<sup>(1)</sup>世尊！是般若波羅蜜為大事故起。<sup>(2)</sup>世尊！是般若波羅蜜為不可思議事故起。<sup>(3)</sup>世尊！是般若波羅蜜為不可稱事故起。<sup>(4)</sup>世尊！是般若波羅蜜為無量事故起。<sup>(5)</sup>世尊！是般若波羅蜜為無等等事故起。」<sup>99</sup>

**二、如來述歎**

**（一）如來述成**

佛言：「如是！如是！須菩提！般若波羅蜜為大事起，為不可思議事起，為不可稱事起，為無量事起，為無等等事起。」

**（二）別釋五事**

**1、約大事歎**

須菩提！云何是般若波羅蜜為大事故起？

須菩提！諸佛大事者，所謂救一切眾生，不捨一切眾生。

**2、約不可思議事歎**

須菩提！云何是般若波羅蜜為不可思議事起？

須菩提！不可思議事者，所謂諸佛法、如來法、自然人法、一切智人法。

以是故，須菩提！諸佛般若波羅蜜為不可思議事起。<sup>100</sup>

**3、約不可稱事歎**

須菩提！云何般若波羅蜜為不可稱事起？

須菩提！一切眾（551b）生中無有能思惟稱<sup>101</sup>佛法、如來法、自然人法、一切智人法。

<sup>99</sup> 《大般若波羅蜜多經》卷 443〈47 示相品〉：

爾時，具壽善現白佛言：「世尊！甚深般若波羅蜜多為大事故出現世間，為不可思議事故出現世間，為不可稱量事故出現世間，為無數量事故出現世間，為無等等事故出現世間。」（大正 7，235b11-15）

<sup>100</sup> 《大般若波羅蜜多經》卷 443〈47 示相品〉：「善現！云何如是甚深般若波羅蜜多為不可思議事故出現世間？善現！一切如來、應、正等覺所有正等覺性、如來性、自然覺性、一切智性，皆不可思議，甚深般若波羅蜜多為此不可思議事故出現世間。」（大正 7，235b23-27）

<sup>101</sup> 稱（彳亼）：1.稱量。（《漢語大詞典》（八），p.111）

以是故，須菩提！般若波羅蜜為不可稱事起。<sup>102</sup>

#### 4、約無量事歎

須菩提！云何般若波羅蜜為無量事起？

須菩提！一切眾生中無有能量佛法、如來法、自然人法、一切智人法。

以是故，須菩提！般若波羅蜜為不可量事起。

#### 5、約無等等事歎

須菩提！云何般若波羅蜜為無等等事起？

須菩提！一切眾生中無有能與佛等者，何況過！

以是故，須菩提！般若波羅蜜為無等等事起。」<sup>103</sup>

### （貳）依新學菩薩別辨諸法皆不可思議乃至無等等

#### 一、正明

##### （一）須菩提問

須菩提白佛言：「世尊！但佛法、如來法、自然人法、一切智人法，不可思議、不可稱、無有量、無等等事起耶？」

##### （二）佛答

#### 1、諸法皆不可思議乃至無等等

佛告須菩提：「如是！如是！佛法、如來法、自然人法、一切智人法，不可思議、不可稱、無有量、無等等。

色亦不可思議、不可稱、無有量、無等等，受、想、行、識亦不可思議、不可稱、無有量、無等等，乃至一切種智、法性、法相不可思議、不可稱、無有量、無等等。是中，心、心數法不可得。<sup>104</sup>

#### 2、諸法不可思議乃至無等等皆亦不可得

復次，須菩提！色不可思議，是亦不可得；乃至色無等等，是亦不可得。受、想、

<sup>102</sup> 《大般若波羅蜜多經》卷 443〈47 示相品〉：「善現！云何如是甚深般若波羅蜜多為不可稱量事故出現世間？善現！一切如來、應、正等覺所有正等覺性、如來性、自然覺性、一切智性，定無有情有情數攝三界、五趣、四生攝者可能稱量，甚深般若波羅蜜多為此不可稱量事故出現世間。」（大正 7，235b27-c4）

<sup>103</sup> 《大般若波羅蜜多經》卷 443〈47 示相品〉：「善現！云何如是甚深般若波羅蜜多為無等等事故出現世間？善現！一切如來、應、正等覺所有正等覺性、如來性、自然覺性、一切智性，一切世間有情及法，尚無等者，況有能過！甚深般若波羅蜜多為此無等等事故出現世間。」（大正 7，235c9-14）

<sup>104</sup> 《大般若波羅蜜多經》卷 443〈47 示相品〉：  
佛言：「善現！非但如來、應、正等覺所有正等覺性、如來性、自然覺性、一切智性不可思議、不可稱量、無數量、無等等，亦有餘法不可思議、不可稱量、無數量、無等等。善現！謂色亦不可思議、不可稱量、無數量、無等等，受、想、行、識亦不可思議、不可稱量、無數量、無等等，如是乃至一切智亦不可思議、不可稱量、無數量、無等等，道相智、一切相智亦不可思議、不可稱量、無數量、無等等。善現！一切法亦不可思議、不可稱量、無數量、無等等。善現！於一切法真法性中，心及心所皆不可得。」（大正 7，235c18-28）

行、識乃至一切種智無等等，是亦不可得。」<sup>105</sup>

須菩提白佛言：「世尊！何因緣色不可思議乃至無等等，是亦不可得？受、想、行、識乃至一切種智無等等，是亦不可得？」

佛告須菩提：「色量不可得故，受、想、行、識量不可得故，乃至一切種智量不可得故。」<sup>106</sup>

須菩提白佛言：「世尊！何因緣色量不可得乃至一切種智量不可得？」

佛告須菩提：「色不可思議故乃至色無等等故，量不可得；乃至一切種智不(551c)可思議故，乃至一切種智無等等故，量不可得。」<sup>107</sup>

須菩提！於汝意云何？不可思議乃至無等等中，寧可得色、受、想、行、識乃至一切種智不？」

須菩提言：「世尊！不可得。」

「以是故，須菩提！一切法不可思議乃至無等等。」

### 3、結

如是，須菩提！諸佛法不可思議、不可稱、無有量、無等等。

須菩提！是名諸佛法不可思議乃至無等等。

須菩提！是諸佛法不可思議，過思議相故；不可稱，過稱故；無有量，過量故；無等等，過等等故。

須菩提！以是因緣故，一切法亦不可思議相乃至無等等。<sup>108</sup>

<sup>105</sup> 《大般若波羅蜜多經》卷 443〈47 示相品〉：「復次，善現！色不可施設不可思議、不可稱量、無數量、無等等性，受、想、行、識亦不可施設不可思議、不可稱量、無數量、無等等性，如是乃至一切智不可施設不可思議、不可稱量、無數量、無等等性，道相智、一切相智亦不可施設不可思議、不可稱量、無數量、無等等性。」(大正 7, 235c28-236a5)

<sup>106</sup> 《大般若波羅蜜多經》卷 443〈47 示相品〉：  
佛言：「善現！色無限量故不可得，不可得故不可思議、不可稱量、無數量、無等等；受、想、行、識亦無限量故不可得，不可得故不可思議、不可稱量、無數量、無等等。如是乃至一切智無限量故不可得，不可得故不可思議、不可稱量、無數量、無等等；道相智、一切相智亦無限量故不可得，不可得故不可思議、不可稱量、無數量、無等等。」(大正 7, 236b17-25)

<sup>107</sup> 《大般若波羅蜜多經》卷 443〈47 示相品〉：  
佛言：「善現！色相不可思議、不可稱量、無數量、無等等故無限量，受、想、行、識相亦不可思議、不可稱量、無數量、無等等故無限量，如是乃至一切智相不可思議、不可稱量、無數量、無等等故無限量，道相智、一切相智相亦不可思議、不可稱量、無數量、無等等故無限量。」(大正 7, 236b29-c5)

<sup>108</sup> 《大般若波羅蜜多經》卷 443〈47 示相品〉：  
佛言：「善現！如是！如是！由此因緣，一切法皆不可思議、不可稱量、無數量、無等等。善現！以一切法皆不可思議、不可稱量、無數量、無等等故，一切如來、應、正等覺所有正等覺法、如來法、自然覺法、一切智法亦不可思議、不可稱量、無數量、無等等。善現！一切如來、應、正等覺所有正等覺法、如來法、自然覺法、一切智法皆不可思議，思議滅故；不可稱量，稱量滅故；無數量，數量滅故；無等等，等等滅故。善現！由此因緣，一切法亦不可思議、不可稱量、無數量、無等等。  
善現！一切如來、應、正等覺所有正等覺法、如來法、自然覺法、一切智法皆不可思議，過思議故；不可稱量，過稱量故；無數量，過數量故；無等等，過等等故。善現！由此因緣，一切法亦不可思議、不可稱量、無數量、無等等。」(大正 7, 236c13-28)

## 二、總列四事，依二諦明

### （一）不可思議、不可稱、無有量、無等等依四事辨

須菩提！不可思議名，是義不可思議；不可稱名，是義不可稱；無有量名，是義不可量；無等等名，是義無等等。須菩提！是諸佛法不可思議乃至無等等。<sup>109</sup>

### （二）舉虛空喻四事

不可思議，如虛空不可思議；不可稱，如虛空不可稱；無有量，如虛空無有量；無等等，如虛空無等等。須菩提！是亦名諸佛法不可思議乃至無等等。

### （三）世間無能思議稱量者

佛法如是無量，一切世間天、人、阿修羅無能思議籌量者。」<sup>110</sup>

### （參）與會者疑除悟道

說是諸佛法不可思議、不可稱、無有量、無等等品時，五百比丘一切法不受故，漏盡心得解脫，得阿羅漢；<sup>111</sup>二十比丘尼亦不受一切法故，漏盡得阿羅漢；六萬優婆塞、三萬優婆夷諸法中遠塵離垢，諸法中法眼生；<sup>112</sup>二十菩薩摩訶薩得無生法忍，於是賢劫中當受記。

【論】釋曰：

## 參、歎般若能成大事

### （壹）明般若依五事故起

#### 一、須菩提正歎

#### （一）般若為大事故起

須菩提深解般若相，於諸法中無著無礙，心生歡喜，白佛言「世尊！般若波羅蜜為大事故起」等。

「大事」者，破一切眾生大苦（552a）惱、能與佛無上大法，故名為「大事」。

#### （二）般若為不可思議事故起

「不可思議」，先已答。<sup>113</sup>

<sup>109</sup> 《大般若波羅蜜多經》卷 443〈47 示相品〉：「善現！不可思議者但有不可思議增語，不可稱量者但有不可稱量增語，無數量者但有無數量增語，無等等者但有無等等增語。善現！由此因緣，一切如來、應、正等覺所有正等覺法、如來法、自然覺法、一切智法皆不可思議、不可稱量、無數量、無等等。」（大正 7，236c28-237a5）

<sup>110</sup> 《大般若波羅蜜多經》卷 443〈47 示相品〉：「善現！一切如來、應、正等覺所有正等覺法、如來法、自然覺法、一切智法，聲聞、獨覺、世間天、人、阿素洛等，皆悉不能思議、稱量、數量、等等。善現！由此因緣，一切如來、應、正等覺所有正等覺法、如來法、自然覺法、一切智法皆不可思議、不可稱量、無數量、無等等。」（大正 7，237a11-17）

<sup>111</sup> 《大般若波羅蜜多經》卷 443〈47 示相品〉：「佛說如是不可思議、不可稱量、無數量、無等等品時，眾中有五百苾芻不受諸漏心得解脫。」（大正 7，237a17-19）

<sup>112</sup> 聞大證小。（印順法師，《大智度論筆記》〔E015〕p.311）

<sup>113</sup> （1）《正觀》（6），p.182：《大智度論》卷 50（大正 25，420c21-27）。

（2）另參見《大智度論》卷 20（大正 25，211c1-2）、卷 21（220b23-c9）、卷 26（248c2-6）、卷 27（257b20-22）、卷 33（308b11-17）、卷 38（341a27-b1）、卷 50（419a29-421c21）、卷 51（422c12-427b28）、卷 52（42923-431a20）、卷 54（444c24-27）、卷 62（499b2-5）、卷 67（527b24-528b11）。

**(三) 般若為不可稱事故起****1、般若多，智慧少故不能稱**

「不可稱」者，「稱」名智慧；般若定實相甚深極重<sup>114</sup>，智慧輕薄，是故不能稱<sup>115</sup>。

又般若多，智慧少，故不能稱。

又般若利益處廣——未成，能與世間果報；成已，與道果報。

**2、般若無法以常無常、有無等稱知**

又究竟盡知故名「稱」。般若波羅蜜無能稱知——若常若無常、若實若虛、若有若無。

如是等「不可稱」義，應當知。<sup>116</sup>

**(四) 般若為無量事故起**

「無量事」者，

**1、稱即是量**

有人言：「稱」即是「量」。

**2、般若不可取相故無量**

有人言：取相名為「量」，是般若波羅蜜不可取相故「無量」。

**3、以四無量心行般若故名無量**

又菩薩以四無量心行般若，故名「無量」。

**4、凡夫、二乘、菩薩智慧不能量般若得邊故名無量**

又「量」名智慧；凡夫智慧、二乘智慧、菩薩智慧無能量般若得邊者，名「無量」。<sup>117</sup>

**(五) 般若為無等等事故起**

「無等等」者，

**1、般若能與大乘涅槃故**

「無等」名涅槃；一切有為法無有與涅槃等者。涅槃有三分：聲聞涅槃、辟支佛涅槃、佛涅槃。<sup>118</sup>般若能與大乘涅槃，故名「無等等」。

**2、般若利益眾生，令與佛相似故**

復次，一切眾生無與佛等故，佛名「無等<sup>119</sup>」；般若波羅蜜利益眾生，令與佛相似，故名「無等等」。

<sup>114</sup> 新羅元曉撰《大慧度經宗要》引《大智度論》「般若定實相甚深極重」句，「般若」下「定」字作「之」字。(大正 33, 71b23)

<sup>115</sup> (1) 稱(イム)：1.稱量。2.權衡，比較。(《漢語大詞典》(八)，p.111)

(2) 稱(イラ、)：1.相當，符合。(《漢語大詞典》(八)，p.112)

<sup>116</sup> 智慧不稱般若：四釋——似約觀照、實相，對論更詳。(印順法師，《大智度論筆記》[E014] p.310)

<sup>117</sup> 凡夫、二乘、菩薩智慧，不能量般若得邊。(印順法師，《大智度論筆記》[E020] p.319)

<sup>118</sup> 三種涅槃〔似有差別〕。(印順法師，《大智度論筆記》[E021] p.319)

<sup>119</sup> 等+(等)【石】。(大正 25, 552d, n.3)



**3、般若能令眾生得第一微妙諸佛法故**

復次，諸佛法第一微妙，無能與等、無能及者、無可為足<sup>120</sup>；般若波羅蜜能令眾生得是心故，名「無等等」。

**4、「無等」名諸法實相，菩薩得此「無等」，能於眾生中生慈悲心故**

復次，「無等」名諸法實相，諸觀、諸行無能及者，無戲論、無能破壞，故名「無等」<sup>121</sup>；菩薩得是「無等」，能於眾生中生慈悲心故，名「無等等」。

是名「無等等」義。

**二、如來述歎**

**(一) 如來印可**

須菩提是聲聞人，無一切智，而能說是不可思議般若等故，佛可其所說。

**(二) 別釋五事**

佛自說五事——

**1、大事**

**(1) 諸佛以十力等法，欲救濟無量無邊眾生**

眾生無量無邊，多於十方恒河沙等世界中微塵；諸佛以十力等法盡欲救濟，是名「大事」。

**(2) 菩薩不捨眾生故不入無餘涅槃，得佛道時為眾生故甘受五事苦**

復有菩薩久得無生法忍，不捨眾生故，不入無餘涅槃。

復次，是菩薩得佛道時，(552b) 為眾生故受五事；一者、受諸勞苦，二者、捨寂定樂，三者、與惡人共事，四者、與人接對，五者、入大眾會。<sup>122</sup>

佛深得離欲樂，而為眾生故，甘受是五事等種種疲<sup>123</sup>苦，如受功德，是為「大事」。

**2~5、總明不可思議等四事**

**(1) 舉四法辨**

「不可思議」者，所謂佛法、如來法、自然人法、一切智人法。<sup>124</sup>

<sup>120</sup> (1) 足=比【元】【明】【石】。(大正 25, 552d, n.4)

(2) 足(ㄉㄨˊ)：1.匹偶，相配。唐白居易《效陶潛》詩之十：“方知麴蘖靈，萬物無與足。”參見“足配”。(《漢語大詞典》(八)，p.493)

<sup>121</sup> 等+(等)【聖】。(大正 25, 552d, n.6)

<sup>122</sup> 佛為眾生受五事┌捨寂定樂  
                  | 受諸勞苦  
                  └ 與惡人共事  
                  | 與人接對  
                  └ 入大眾會 (印順法師，《大智度論筆記》〔B025〕p.161)

<sup>123</sup> (1) 疾=疲【聖】【石】。(大正 25, 552d, n.9)

(2) 《大正藏》原作「疾」，今依【聖】【石】及《高麗藏》作「疲」(第 14 冊，1078b7)。

<sup>124</sup> 佛四事┌佛法——一切無明睡眠中最初覺故  
          | 如來法——如過〔去〕佛行六度，得如相來佛道故  
          └ 自然人法——簡聲聞  
          └ 一切智人法——簡辟支 (印順法師，《大智度論筆記》〔B025〕p.162)

**A、佛法**

「佛法」者，「佛」名為覺，於一切無明睡眠中最初覺，故名為「覺」。

**B、如來法**

「如來」者，如過去諸佛行六波羅蜜得諸法如相，來至佛道；今佛亦如是道來，如諸佛來，是名「如來」。

**C、自然人法**

「自然人法」者，聲聞人亦有覺、亦有知，而從他聞，是弟子法；是故說「佛是自然人」，不從他聞。

**D、一切智人法**

「一切智人法」者，辟支佛亦自然得、不從他聞，而無一切智；是故說「佛一切智人得<sup>125</sup>」。

**(2) 結義**

是四種法，無有人能思惟稱量，是故名「不可思議」、「不可稱」、「不可量」；更無有法與是法相似者，是故名「無等等」。

**(貳) 依新學菩薩別辨諸法皆不可思議乃至無等等**

**一、正明**

**(一) 須菩提問**

須菩提意，恐新學菩薩著是四法，是故白佛言：「但是四法不可思議、無有與等耶？」

**(二) 佛答**

**1、略述：色等諸法皆不可思議乃至無等等**

佛答：「色等諸法亦不可思議、無稱、無量、無等等。」

**2、釋因由**

佛是中自說因緣：「色等一切法不可得故。」

**3、結成**

「如是，須菩提！諸佛法不可思議」者，是如上事。

「是名不可思議」者，結句。

論者先廣解，佛此中略說：「不可思議，過思議相；過等等相。」<sup>126</sup>

**二、總列四事，依二諦明**

**(一) 示理**

「義趣」，涅槃法不可思議；

「名字」，世諦故可思議。

**(二) 舉喻**

「如虛空不可思議」者，如先品中說「虛空相不可思議」，<sup>127</sup>是故說「不可思議」；

<sup>125</sup> 得=法【宋】【元】【明】【宮】【聖】【石】。(大正 25, 552d, n.11)

<sup>126</sup> 《正觀》(6), p.181:《大智度論》卷 50 (大正 25, 420c21-28)。

<sup>127</sup> 《正觀》(6), p.182:《大智度論》卷 51 (23 含受品)(大正 25, 424b19-425a14)。

乃至無等等如虛空，虛空無可喻故，名「無等等」。

### 〔三〕世間無能思議稱量者

般若波羅蜜相即是佛法相；不可思議、無量、無稱、無等等，即是佛法相。

「是佛法，一切世間天、人、阿修羅無能思議稱量」者，六道中但說（552c）三道者，三善道眾生尚不能稱量，何況三惡道！

### 〔參〕與會者疑除悟道

#### 一、正辨得道者

問曰：說是品時，何以故比丘尼、菩薩得道者少？

答曰：

#### 〔一〕白衣

此中多讚歎諸佛法，所謂「不可思議、無稱、無量、無等等」，聞者多增益信根故，是故白衣得道者多。

女人雖復信多，智慧少故，得道者亦少。

白衣貪著世事、智慧淺薄、鈍根，不能盡漏。

#### 〔二〕比丘、比丘尼

諸比丘信、慧諸根等，一心求道故，漏盡者多。

比丘尼智慧少故，二十人得漏盡；雖多得初道，數過白衣，不盡漏故，不異白衣，此中不說。

#### 〔三〕菩薩

入無生忍法<sup>128</sup>，甚深難得故少，又以於此法種因緣者少。

#### 二、釋「賢劫中當受記」

「賢劫中當受記」者。

或有人言：「賢劫中千佛，除四佛<sup>129</sup>，當與受記。」<sup>130</sup>

或有人言：「釋迦文佛與受記：『於賢劫中，在餘世界作佛。』」

<sup>128</sup> 無生忍法=無生法忍【聖】【石】。(大正 25, 552d, n.16)

<sup>129</sup> 四佛：拘樓孫佛、拘那含佛、迦葉佛、釋迦牟尼佛。

<sup>130</sup> (1)《長阿含經》卷 1 (1 經)《大本經》：「此賢劫中有佛名拘樓孫，又名拘那含，又名迦葉，我今於賢劫中成最正覺。」(大正 1, 1c19)

(2) 另參見《雜阿含經》卷 34 (956 經) (大正 2, 243b13-244a8)，《七佛經》(大正 1, 150a17-24)，《增壹阿含經》卷 45 (48 不善品) (大正 2, 790a27-b13)，《大智度論》卷 9 (1 序品) (大正 25, 125a13-15)。